


jēkabbara



"ni jēkafò ye daamu ye,
jekabaara nyogòn daamu tè."



nimòrò 6 - san 1986n zuwèn kalo - a sòngò : dòròmè 20.



Min bë sòrò nimòrò in kònò, o filè nin ye :

- nyè 2 ani 3 Faso kònseyi tonsigi naeninan kèra
- nyè 3 ani 4 Kòori sènè baarada kunnafoni
- nyè 5 Cikè dönniya : shò sènè
- nyè 6 ani 7 Dinyè kibaruya : kòori san ko dinyè kònò
- nyè 8 Tulon tè sèbè sa

Faso kònsègi tònden naaninan kèra tònden nyumanya tònsigi ye.

Jèkabaara nimòrò 5 kònò, layidu tara ko faso kònsèyi tònsigi naaninan ka dantigèli sèbèn kònò kuma kolo-maw bëna nyèfò jèkabaara kònò. O kuma filè nin ye :

Sòrò yiriwali baara kè cogo

Faso kònsèyi mògòw ye dannaya kuraya, k'a da an ka sòrò yiriwali baara kè cogo kan.

O la, u y'a jira ko an ye sira min ta sòrò yiriwali kanma, o ye sira ye, min ni Malidenw ka cogoyaw bë se nyögòn ta.

U y'a nyini ko nyèsin ka kè Malidenw haminanko jònjànw ma ani walew ka kè, minnu bë se ka tilennenya, laadiriya, bèn, kelenya, nyögondémè, danbe ani yèremahòrònya kè sòrò baara jösenw ye.

Forobatònba

Faso kònsèyi y'a jira ko Mali fanga jösen fòlò ye pariti ye, n'o ye forobatònba ye. O de b'a to Malidenw bë se ka se k'u hakilina ta jira bèn ni kelenya kònò ani yèrè ladamu kònò, faso kùntilennaw kan ani faso ka baara kétaw kan.

O la, faso kònsèyi y'a nyini pariti fè, kotonyögontala ka-sinsi politiki baara kònò; bari ale de bë se ka bèn ni kelenya sinsi pariti kònò.

A nyininan bë fana pariti fè, n'a bë baara o baara kè sòrò yiriwali kanma, hadamadenya sinsi kanma, ani dònko ni sekò sabatili kanma, a k'o baara kè k'a kenyè ni jamadenw hakilina ni a se ko ye.

A nyininan bë fana, pariti sariyaw ka lajè tuguni, yaasa k'u labèn cogo la, cogo min b'a to Malidenw bë se ka kè tònden ye.

U y'a nyini pariti fè, ale min ye Mali fanga jösen fòlò ye, a ka walew kè ani ka sariyaw ta, minnu b'a to :

- Pariti bë se ka kè Mali fén bë se san fè.
- Pariti nyèmögòw ka se ka sugandi pariti sago la, yaasa u ka se k'u ka baara kè a nyè ma, ka tònden nyumanya hakili don ani k'a sinsi tòndenw bë se la.

Foroba baarakèlaw

Faso kònsèyi y'a jira ko tilennenya ni laadiriya de b'a to faso foroba baarakèlaw bë se k'u ka baara kè a nyè ma Malidenw bë se sago la, k'a sòrò u ma danfara kè u ni nyögòn cè.

A jirala ko yuruguyurugu, danfarali ni surafènminè këlen bë se ka foroba baarakèla caman jogo tinyè.

O la, a y'a nyini tònden bë se fè, u ka walew kè, u ka siraw ta, minnu bë se ka nin jogo juguw kèle ka bò Mali la, yaasa an ka politiki n'an ka sòrò yiriwali n'an ka hadamadenya sinsi bë latilen ani ka jiidi konyuman.

A ye yamaruya di forobatònba nyèmögò ma, a ka jamakulu dò sigi sen kan, min bë se ka sariyaw boli, minnu talen don ka surafènminè ni yuruguyurugu kèle.

Mali mara baaradaw

Faso kònsèyi y'a jira ko Mali mara, n'o ye gòférènaman ni foroba baaradaw ye, olu fana tinyènen don. Baara tè kè a nyè ma, wa a kèli ka suma.

O la, faso kònsèyi y'a nyini pariti fè, a k'i teliya k'i nyèsin foroba baaradaw latilenni ma, yaasa baara bë se ka kè Malidenw sago la.

A y'a nyini forobatònba nyèmögò fè, a ka walew kè, minnu bë se k'a to kiritigèsoba ni depite jékulu bë se k'u ka kòlòsili boli gòférènaman kan sanga ni waati bëe.

Ja ni sahelikungo ka nyetaa

Faso kònsèyi y'a jira ko ja ni sahelikungo ka nyetaa ye Mali jugu fòlò fòlò de ye.

O la, a y'a nyini Maliden bée fè, u k'u kafo ka nin jugu fila ninnu kèle cogo bée la.

Finyè minnu b'an degun

Faso kònsèyi y'a jira ko Mai sòrò yiriwali degunnen don kosèbè finyè caman fè. Dòw y'an yèrè nò ye, an se ko tè dòw la.

O la, faso kònsèyi y'a nyini pariti fè :

- A ka siraw ta, minnu b'a to Maliden bée k'i nyèsin sòrò yiriwali baara ma, yaasa finyè minnu y'an nò ye, an k'olu kèle ka bò an sen kòrò.

- A ka walew kè, minnu bè se ka sòrò in jiidi ani k'a lakana, i n'a fò ka walew kè, cogo min musow ni denmisènw jòyòrò bè se ka sabati sòrò yiriwali baara la.

- A ka fèerèw tigè, minnu faamuya ka teli Maliden fè sòrò jiidili siratigè la.

- A k'i se ko danmajira bée kè yaasa Maliden bée k'a dòn ani k'a waleya ko sòrò in tè se ka yiriwa ani ka sabati u yèrè kò.

- A ka walew kè, ani ka sariyaw boli, minnu bè se k'a to, sannifeere kònòna na, fènw sòngò ni baarakèlaw ka sara bè se ka nyògòn ta.

- A ka teliya ka sariyaw boli, minnu talen bè ka nògòya don julaya la ani nafolotigiw ka baara kétaw la izini ko sira fè.

- A ka fèerèw tigè, minnu bè se k'a to, faso ka izini minnu tè se u yèrè kòrò, u ka bila kènyèrèw ka bolo kan.

- A k'a nyèsin jagomanfilakèlaw kèleli ma, yaasa fèn sòngò yèlènni bè dabila.

Denmisèn kalannenw ka baara

Faso kònsèyi y'a jira ko denmisèn kalannenw ka baara ko gèlèyalen don kosèbè.

A y'a nyini pariti fè a ka walew kè, minnu bè se ka baara sòròtajiji.

A y'a nyini pariti ni gòfèrènaman fè u ka sira bò, minnu bè denmisènw dèmè, u ka se ka baara kè u yèrè ye.



jurudon jèkulu ka baara dugu giriwa tòn kònò

Kalo tèmènen, kunnafoni dira jèkabaara kònò nyinan samiyè lahalaya kan, n'o ye nògòw ni furajiw sòngò yèlènni ye.

Laadilikan danma dòw fòra jèkabaara in kònò, ka nyèsin sénèkèlaw ka sòrò siratigè ma. Nka, dugu yiriwa tòn nyémögòw bè se k'o laadilikan dafa, ka sénèkèlaw dèmè u ka sénè ko nyénabòli la k'a bèn u ka se ko ma sénè na. O ye jurudon jèkulu ka baara ye.

sègesègèlli

Jurudon jèkulu tè se ka juru don sénèkèla la n'a ma a ka se ko dòn sénè na.

Sénèkèla se ko ye min ye, n'i b'a fè k'o dòn, fo k'a sòrò, i y'a

ka san tèmènen sòrò kunnafoni bée dòn. O kunnafoni danma dòw filè, n'u bè sòrò sèbènw kònò, i n'a fò juru sèbèn, foro suma sèbèn, ani cikèla kunnafoni sèbèn :

- kènè sénènen hakè kèra min ye sénèfèn kelen kelen na,
- sénèkè wale kérènkérènnen minnu kèra,
- sénèkèla ka sòrò bènna hakè min ma san kònò taari kelen kelen na,
- juru talen ni juru saralen hakè kèra min ye.

Walasa ka juru nyinibaga ka se ko dòn kòori sénè na, jateminè bè k'e ka a ka kòori sòròlen sanga ni dugu ka kòori sòròlen ye taari kelen kelen na : o bè se ka k'e n'i ye dugu ka kòori sòròlen mumè tila kènè taari hakè ye, min sénèna kòori la.

Juru nyinibaga ka suman

sòròlen fana bè dòn n'i ye sòrò jateminè kènèninw kòlòsi, minnu bè sigi forow kònò.

Ni sénèkèla b'a fè k'a ka kènè sénèta bonya, a k'a sòrò a ye fèerè kuraw tigè ka bèn o walew ma. O fèerè kuraw bè se ka tigè n'a y'a sòrò cikèla ye sénèkè misiw wali sénèkè minèn kuraw san, i n'a fò dannikè mansin, dabanjana, walima ni dò farala a ka dabatalaw hakè kan, walima a ka nògò dilanta hakè kan.

O jateminèw b'a to, dò bè se ka fò sénèkèla ka san nata sòrò kan, k'a dòn ni cikèla ka sòrò bè se ka sénèkè minèn ni sénèkè misiw lase a ma. O b'a to fana sénèkèla ka tòn bè se ka jateminè sán kònò : magonyè minèn sòngò mana bò sénèfèn feerelen sòngò la, a tò ye warì sòròlen ye cikèla fè san kònò.

Jurudon jèkulu ka baara ye ka ninnu bée sègèsègè, ka cikèda bée lasòmi juru ko la, k'a kènyè n'u ka sòrò ye : a delila k'a fò ko n'i ka sòrò ma i ka juru nyògòn saba bò, i bëe bin, i tè nafa si sòrò juru don ko in na.

juru minnu bëe don

Jurudon jèkulu ka baara ye fana ka juru don; i n'a fò nògò juru, minènw juru, ani samiyè còcò juru.

kòlòsili

Juru donnen tè jurudon jèkulu ka baara bannen ye. Kòlòsili de ka kan ka kè, walasa juru donnen ninnu ka tònò lase a tigi ma.

Nògò don tuma, forow bëe kòlòsi, k'a dòn n'u falen cogo nyèna. N'u ma sun sòrò, u tèna se ka nògòw juru sara. O tuma, nògò don kun tè foro ninnu na.

Furakèli tuma, tinyènifènw ka baara bëe kòlòsi foro kònò, walasa ka furakèli tuma jònjàn dòn.

O kòlòsili kelen in bëe labato samiyè laban tuma na fana, kosala furakèli kosòn.

O kòrò ye ko jurudon jèkulu bëe jò ni juruw kunko ye fo ka taa se u sara tuma ma sannifeere waati la.


juru sèbènw

Jurudon jèkulu ka baara tè taa juru sèbènw lafa cogo nyuman kò. O baara in sinsilen don foro suma jèkulu mògò tilen-nya de kan, olu minnu bëe sènèfènw jateminè.

Jurudon jèkulu ka baara nafa ka bon dugu ka nyètaa sabatili siratigè la. Bawo, olu de bëe jò ni dugu kunko caman ye.

Balikukalan kuntigiw ani ci-kèlakòlidenw Tabènennen don sanga ni waati bëe ka dugu mògòw kalan ani k'u dèmè nin siratigè fôlen kan.

An ka numuw ka fèerèw tè ban



Sibiri Sara filè nin ye, n'o ye Ntoganaso numukè ye,
o de fòlò sera Mali kònò

ka moto mòtèrè sigi dannikèmansin kan.

Cikèminèn in b'a to danni bëe kè
k'a sòrò e mago ma se bagan ma.

O la,

sènèkèla b'a ka misiw mara bulukuli ni shyènni kanma,
ka bèn waati ma

kènèga sabatili walew

Nyògonye dò kéra Kucala san 1985 kalo tannan, tile 11. O nyògonye tun bëe kòori sènè baarada kafo duuru ka karamògòso nyémögòw ni Sikaso mara dògò-tòrò nyémögòw de cé.

Nyògonye in kéra tile saba kònò. A kun tun ye ka fèerèw tigè kènèya sabatili walew kan Mali woroduguyan fan fè.

Nyògonye in ye Sikaso mara kònò baara kèlenw lajè, minnu kéra kabini san 1983. Baara fèn o fèn bëe kènèya sabati kòori sènè baarada yòròw la, o bëe dantigèra.

A jirala ko dugu yiriwa tòn ka furakèli yòrò jòli ye baara nyuman ye, min ka kan ka sinsi. O kanma, duguw furakèsutigiw ka kalan kurayara sani kuraw ka sigi.

A jirala ko yaasa kènèya ni saniya baara ka sabati, baliku-kalan kuntigiw ni aròndisiman dògòtòròw ka kan ka nyògòn lajè kalo o kalo, k'u hakili falen falen kènèya sabatili walew kan.

O de siratigè la, sani baara fèn o fèn ka jènsèn, o baara nyémögò bëe lajè, k'u kalan. Kalan in kun fòlò kéra dògòtòròw kalanni ye.

*
* *

O kò fè, marisi kalo tile 5 san 1986, Kucala dògòtòròw ni bali-kukalan kuntigiw ni sènèkè nyémögò taara Nankòròla, ka taa nyègèn dilan ni wuluwulu bò cogo nyuman kalan. O kalan bëna jènsèn balikukalan kuntigiw ni dògòtòròw fè dugu yiriwa tòn kònò.

cikè donniga

shò sènè

Jèkabaara tèmènenw kònò, kuma danma dòw fòra sarimisiw ladon ko nyuman kan ani u balo cogo kan, k'a jira k'a fò ko fèn dòw bè se ka sènè bagan balo kama.

Fèn min sènè ka nyi kosèbè o la, o ye shò ye. Barisa, ale de si sòrò ka di an ka duguw kònò. Shò bè fèn caman nyè : bagan bè shò kala nyimi tilema kònò, a b'u nòoroya ka fanga di u ma, u bè mèen baara la k'a sòrò u ma dèse. Hadamadenw b'a kisè dun, bawo balo don, min nafa ka bon. A bè se ka wari lase sènèkèlaw ma.

shò dan cogo

shò dan yòrù

Shò bè se ka sènè k'a kè shò foro gansan ye. A bè se ka dan fana maanyò foro la.

N'i ye shò dan fèn o fèn nò na (i n'a fò maanyò, sanyò, keninge, kòori), a bè nyè.

N'i y'a dan labure la, o bè nyè. Nka, i bè jateminè kè, a kana kè yòro ye, ji bè sigi yòro min. Barisa, ni ji sigira shò kòrò, a bè tinyè.

shò si

An bè bi bi min na, shò si min nafa ka bon, o ye an ka shòba ye, min bè wayo.

shò dan waati

N'a kèra shò foro gansan ye, ni shò bè dan shò kisè kanma, a bè dan zuluye kalo laban tuma na. N'a bè dan shò kala kanma, walima n'a bè dan kisè ni kala fila bée kanma, a dan waati ye zuluye kalo daminè tuma ye.

Ni shò bè dan maanyò foro la, n'i b'a sènè kisè kanma, walima kisè ni kala fila bée kanma, i b'a dan maanyò dannen kò tile 30 walima tile 40. N'i b'a sènè kala gansan kanma, i b'a dan maanyò dannen kò tile 20 walima 30.

shò dan cogo

Taari kelen danni si bè bén kilo 15 ma.

N'a kèra shò foro gansan ye, n'i bè kisè nò fè, walima kisè ni kala bée, i bè danni dingew cè kè santimètèrè 35 ye, ka walaw cè kè santimètèrè 60 ye. N'i bè kala

dòròn de nò fè, i bè danni dingew cè kè santimètèrè 45 ye, ka walaw cè kè santimètèrè 80 ye.

Ni shò bè dan maanyò foro la, n'i bè kisè nò fè, walima kisè ni kala, danni dingew cè bè kè santimètèrè 30 ye, walaw cè bè kè santimètèrè 80 ye. N'i bè shò kala de nò fè, danni dingew cè bè kè santimètèrè 40 ye, ka walaw cè kè santimètèrè 80 ye.

Ni danni bè kè, shò kisè fila fila de bè don dingè kònò.

nògò dan

Shò sènè bè se ka kè sababu ye ka dugukolo barika segin a ma. Nka, o t'a bali tubabunògò dòonin ka kè a kòrò a wuli tuma, sani a diliw ka barika sòrò.

N'a kèra shò foro gansan ye, n'i y'a sènè shò kisè kanma, walima shò kisè n'a kala kanma, i bè nògòfin kilo 50 ni nògòjè kilo 50 kè shò kòrò taari kelen o kelen na. N'i y'a sènè shò kala de kanma, nògòfin kilo 50 de bè kè a kòrò taari kelen o kelen na.

N'a danna maanyò foro la, nògò wérè tè don ka fara maanyò nògò kan.

shò foro ladon cogo

Foro ka kan ka jè, k'a ta a dan tuma, fo a tigèli waati.

Ni shò foro gansan don, a bè furakè n'i ye feere fòlow ye. N'a danna maanyò foro la, a bè furakè n'i ye maanyò tigè waati min.

shò bò cogo

N'i bè kala nò fè, ni shò foro gansan don, i mana a dan ka kalo fila kè, i bè se ka kala sama. N'a dannen bè maanyò foro la, ni maanyò tigèra ka waati kè, i bè shò kala sama. Shò kala tòni kelen bè se ka sòrò taari kelen na.

N'i bè kisè nò fè, n'a kògora ka ja, i b'a bò.

N'i bè kisè ni kala nò fè, n'i ye shòden bò ko fòlò kè, o kò fè tile 15 walima tile 20, i bè se ka kala sama.

shò lamara cogo

shò si

Ni shò si man ca, i bè se k'a lamara pòsòni bidòn kòrò kònò, halì ni sijolan t'a la.

N'a ka ca, i bè se ka nògò bòrè lankolon fila don nyögò kònò, ka shò kisè kilo 40 don a kònò, ka sòrò ka sijolan garamu 180 nyagami a la.

Shò si furakèlen man kan ka dun.

shò kisè dunta

Shò si mara cogo tè se ka kè ka shò dunta mara. An bè don min na i ko bi, shò dunta bè mara n'an ka shò mara cogo kòrò ye, i n'a fò bugurijè, toronto, si tulu.

shò kala

Shò kala jalan bè mara ga san fè. I bè nyò kala kè k'a datugu, walasa tile kana digi a la.

dinyè kibaruga

Kòori san ko dinyè kònò

kòori mugu tò maralen cayara dinyè kònò

Kòori bë-sènè jamana caman na dinyè kònò; o bë sènè dinyè gerenkanna bëe la, i n'a fò Azi, Ameriki, Afiriki, Eropu, ani pasifikasi kònò gunw.

San tan tèmènen ninnu kònò, kòori feere cogo nyèna kosèbè. O kèra sababu ye ka jamana caman bila cèsiri la, walasa ka se ka dò fara u ka kòori sòròta kan. O la, san 1984 kònòna na, dò farala dinyè kònò kòori taari sènèta kan, i n'a fò, taari kèmè o kèmè, taari tan ni kelen farala o kan. Dinyè kònò kòori mugu sòrò bérèkènyè bènna kilo 540 ma

taaari kelen na, min nyögònna ma deli ka sòrò abada.

O la, dinyè bëe lajèlen ka kòori mugu sòròlen bènna tòni miliyòn 18 ni tila ma, k'a sòrò dinyè fini dilen iziniw mago bë tòni miliyòn 15 de la. O de ye kòori mugu tò maralen caya ka dama tèmè.

Salon, jamana dòw ye dò kë walasa dò ka bò kòori sòròlen na. Nka dòonin dòròn de bòra kòori sènènen hakè la : taari kèmè o kèmè, taari fila de bòra a la. O b'a to, zuluye kalo nata, dinyè kòori mugu tò maralen bèna bènna tòni miliyòn 11 ni kò ma.

kòori sòngò


O de y'a to kòori mugu sòngò jiginna : sòròlen hakè tèmèna nyininien hakè kan.

- san 1984 kònòna na, kòori mugu kilo kelen tun bë feere dòròmè 142.

- san 1985 kònòna na, a kilo kelen feerela dòròmè 9'4.

- san 1986 kònòna na, a kilo kelen bèna feere dòròmè 81.

A bë se k'a fò ko san fila bë tèmè sani an ka bò nin gèlèya in na. Jamana minnu bë kòori sènè kosèbè, n'olu sera ka dò bò u ka kòori sènèta la, kòori na se k'a sòngò kòròlen sòrò san 1987 laban na.



dinyè kònò jamana minnu bë kòori sènè kosèbè

Mali bëna bònè a ka kòori feere la

Kòori sènè jòyòrò ka bon Mali kònò. Bawo Mali ka dòròmè mugan o mugan sòròlen na, dòròmè #2 bë sòrò kòori la. Nka, o wari bë sòrò ka bò kòkan, kòori bë feere yòrò min na. O de b'a to kòori sòngò tè konyénabò Mali kònò, fo a feere yòrò la Mali kòkan.

Nyinan ni san nata, Mali bëna bònè a ka kòori feere yòrò la. Bawo kòori mugu sòrò musakaw ka ca n'a san sòngò ye a feere yòrò la Mali kòkan.

O kanma, Mali nyémögòw bë ka fèerèw tigè walasa ka se ka dò bò kòori sòrò musakaw la. O la cèsiri nyinina cikèlaw fè : dò farala magonyè minènw sòngò kan (1 n'a fò nògò ni bagaji), nka kòori kilo sòngò bë to dòròmè 17 la san 1986 ni san 1987 kònòna na.

Fèerè wèrèw bë sen na, walasa ka se ka san fila ninnu gèleya tèmè ani ka kòori sènènaw ka sòrò sinsi konyuman.



Mali ye kòori tòni 175 525 sòrò san 1985, k'a sòrò san 1984 ta tun kèra tòni 144 261 ye, i n'a fò dò farala a kan fo ka kè kilo 26 ye, kilo kèmè o kèmè.


Kòori mugu tòni 67 159 sòròla o la.

Kòorikolo sòròlen kèra tòni 102 191 ye : tòni 73 800 tulù bòra Kuçala tulubò izini na, tòni 16 753 tulù bòra Kulukòrò tulubò izini na, tòni 11 408 maralen bë danni si kánma.

dinyè kònò

Kòori mugu min sòròla salonnasini jamana dòw la, minnu bë kòori sènè kosebè, o filè nin ye :

1. Sinuwa jamana tòni 6 200 000
2. Lamérikan jamana tòni 2 913 000
3. Irslam jamana tòni 2 400 000
4. Endu jamana tòni 1 250 000
5. Palditan jamana tòni 860 000
6. Berazil jamana tòni 618 000
7. Tirkì jamana tòni 580 000
8. Misra jamana tòni 390 000



Mali ye kòori mugu tòni 55 392 de sòrò salonnasini.

sinuwa jamana ka kòori

Sinuwa jamana kèra kòori sènèbagà fòlò ye dinyè kònò. San saba tèmènen kònò, a ye yèlèma don a ka bearakè cogow la, ka dugukolo tila kura ye sènèkèlaw ni nyogòn cè, ka dò fara kòori san sòngò kan, ka kòori si kura sènè.

O bëe lajèlen kèra sababu ye, sinuwa jamana tun bë kòori min sòrò san o san fòlò, a sera k'o nyogòn fila de sòrò salonnasini, n'o kèra tòni 6 200 000 ye.

Fini dilan iziniw bë Sinuwa jamana na, minnu bë se ka kòori mugu tòni 3 400 000 baara san o san. A tò tòni 2 800 000 bë taa feere Sinuwa jamana kòkan, o de kèra sababu ye ka kòori santa caya dinyè kònò.

Salon Sinuwa jamana y'a ka kòori sènènen dògoya dòonin. Kòori mugu sòròlen bëenna tòni 5 200 000 ma. O b'a jira ko tòni miliyòn 2 nyogòn bë taa feere kòkan halì bi, min bëna kòori santa caya dinyè kònò, ka kè sababu ye dò bë bò a sòngò la.

farafinna

Mali n'a kèrè fè jamana ka kòori sòròlen kèra min ye salonnasini, o filè :

1. Kodiwari tòni 212 070
2. Mali tòni 144 261
3. Burukina faso tòni 88 134
4. Senegali tòni 46 337
5. Nizéri tòni 3 884
6. Lagine tòni 560

tulon te sebe sa

Fulò kunba ka kabako

Fulò kunba dò sugora. A wulila ka morikè sègèrè, ka taa ka sugu kan nyèfò a ye. Morikè donna kaluwa la. A bòlen nana a fò fulò kunba ye ko a ka sugo in kòrò man di.

A ko fulò kunba ka taa dosokòrò bo kènè kènè nyini ka na. A bèna baara dò kè n'o ye, k'a di fulò kunba ma. A ko n'o tè, fosi tè fulò kunba kisi saya ma nyinan.

Fulò kunba taara yèlèn ntomi sun dò la, dosokòròw ka kungotaa sira kun na. Dosokòròw na tuma selen, fulò kunba y'i dogo ntomi bulu cè ma, fo kòròbalen bée ka tèmè. Wuludennin dò nana se ntomi sun jukòrò, a y'i to ntomi sun san fè k'i bari o la. A bala kojugu o la, a ye bo kè. A y'o bo ta, k'a ka morikè sègèrè. A ko :

- "Morikè, n ye dosokòrò bo sòrò."

Morikè ye bo in lajè, k'a fò ko nin, kòni ye wulu bo ye, ko dosokòrò bo ka kunba nin ye. A ko :

- "Ni min b'a nyè, o k'a nyè. Ni min fana t'a nyè, o k'a nyè.

bawo ne tè dò wèrè sòrò ka tèmè nin kan."

Morikè ye baara kè ni bo in ye, k'a di fulò kunba ma.

Fulò kunba taara yèlèn tuguni k'i sigi a ka ntomi sun kelen san fè. A y'i to ka dògòjò muso dò natò ye, di bara b'a kun. Muso se tuma ntomi sun kòrò, o sen talonna k'a bin, ka di bara ci. Muso ko :

- "Nka, nin ye kabako ye."

Muso y'a ka di kunnala cè, ka taa ka dugumala ta to yen. Fulò kunba jiginna, ka na o tò dun. O diyara a da minkè, o dògò kunnyögòn, fulò kunba solila ka na i sigi ntomi sun san fè. A y'i to ka muso kelen in natò ye. Waati min, ni o nana se ntomi sun kòrò, a y'i kan to muso ma :

- "I bë n ka wari in minè, ka kabako dò san, ka sama n ma."

Muso ye wari minè, ka taa se sugu la. A ye yòrò bée yaala, a ma kabako feereta sòrò mögò si bolo. A kònònaganna. Cèkòròba dò y'a ye munumununi na, k'a nyininka ko :

- "E bë mun kan k'a nyini ?"

Muso y'a jaabi ko :

- "Fulò kunba de ye wari di ne natò ma, ko ne ka na kabako san ka sama a ma."

Cèkòròba ko :

- "An ka taa, n ka taa kabako feere i ma."

A ni muso taara. U selen so kònò, cèkòròba taara dosokòrò belebele dò minè, k'o don di bara kònò, ka dinònò kè k'o datugu, k'o sigi muso kun, a ka taa fulò kunba ka kabako d'a ma.

Muso seginna ka taa se ntomi sun kòrò. Fulò kunba jiginna ka na muso dèmè k'a ka kabako jigin, k'a sigi dugu ma.

Muso y'a fò fulò kunba ye ko kabako in tè dayèlè yòrò wèrè la ni fuga cèmancè tè. Fulò kunba y'a ka kabako in ta, ka taa fugaba dò cèmancè la, ka taa i sigi a sen kan, ka to k'a kunna dinònò nèmu n'a nèn ye, fo a nana se dosokòròba kunkolo ma bara kònò.

Kabini dosokòròba y'i pan ka bò bara kònò, a ni fulò kunba y'a lamaga nyögòn kò fuga kònò.

Fulò kunba taa kan këra nin ye :

"kabako, kabako,
dò ka timi, dò ka kuna.
kabako, kabako,
dò ka timi, dò ka kuna."

kuma kòròma

1. Mögò wòorò bë dugu kònò. Ni mögò min sera o bée la, i tè kè mögò ye. N'o fana bée sera i la, i tè kè mögò ye; fo i ka se saba la, saba fana ka se i la.

O ye mögò jumènw ni jumènw ye ?

2. Nin ye fèn dò ye, don o don n'i bèna dò kafo a kan, a bë dògòya. Nka, don o don, n'i bèna dò bò a la, à bë, bonya.

O ye fèn jumèn ye ?

Jaabí : 1. I fa, i ba n'i kòròkè ka kan ka se i la. Nka, i faria ka kan ka se i dan, i dògònl an'i muso la.

2. Bògò dingè.

